

Monday, February 16, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

BUNGKAWN PEACEFUL PROTEST

Aizawl Bungkawn veng thalai ten CID tlanga CID thawkte pisa kai tur hmuh turin peaceful sitting demonstration neiin CID te chhuak tura an duh na thu thuziak an pho lang.

Tukin khan Aizawla Bungkawn veng thalai ten pisa kai tur ten an hmuh leh chhiar theih turin an venga awm CID tlang aṅanga CID te chhuak tura an duhna thuziak hrang hrang an pholang a, kum tam tak kalta an pi leh pute hma lo lak tawhna CID tlang - chu veng mipuite tana insawi zawi nan leh an tu leh fate lo awm tur tana hmuhma tha tak neih nan an duh avangin CID te chu chhuak turin an phut thu an ziak a ni.

Aizawl Bungkawn veng thalai pung khawm te chuan an hma lakna ah politics a tel loh thu sawiin, political party te remchang lo zawng tura an duh loh thu an sawi a, CID tlang chu vantlang kuta a luh theihna turin rei tak hma an lo tawh a, Home minister te an hmuh tawh thin thu leh tun hnaia CM hmuh tumna lehkha an thehluh chu pawmpuina an hmuh lo avanga ralmuang taka an duh ang ngei a CID tlang vengchhung atana hman tangkai an duhna ti lang tura thalai pungkhawm an nih thu an sawi bawk.

Thalai pungkhawm sawi danin he hmuna building te chu a hlui tawh avang a sakthat tur leh sakthat hial tawh te niin, building te sakthat vek a nih chuan an beiseina a thamral mai hlauvin thalai ten an khawtlang hruaitute tha tichak turin buaina siam lo zawngin hma an la a, CID tlang chu tunhmaa a hming 'Dokhama Tlang' tih puttir leh ngei an tum thu an sawi a ni.



ANIMAL INSURANCE

Mizoram sorkarin Natuional Insurance Company (NIC) thawhpuia ran vulhtuten an ran vulhte an thih palh pawha sum an hmuh theihna tura kar hmasa ni 10-a 'Animal Insurance' a tlangzarh chu a taka kalpui turin thla thar (March thla) tir lam atangin district tinah Vety officer training buatsaih a ni dawn a; inurance hi ran vulhtute an lak (claim) dawn chuan NIC lam hian ni 15 chhunga an tihfel hman a ngai a, ni 15 chhunga an tihfel hman loh chuan pawisa an pek tur chu zaa 12 (12%)-in a pung dawn.

Akashvani News Aizawl-in tun hnai khan Animal Insurance chungchangah hian Mizoram sorkara AH&Vety department hotute a kawm a; Vety Director Dr Lalrotluanga Sailo chuan, animal insurance hi chetsualna leh khuarel chhiatna vanga emaw, hri vang emawa ran an thih palha ran vulhtuten zangnadawmna an hmuh theihna tura ruahman a nih thu a sawi.

Dr Lalrotluanga Sailo chuan, ran insurance atan hian National Livestock Mission atangin cheng nuai 138 point 92 hmuh a nih tawh thu a sawi a, Animal Insurance hi central-in a ngaipawimawh a, kum tin kalpui zel kan tum, a ti a; Mizoram sorkarin NIC thawhpuia ran insurance a kalpui hian bawng, sial, vawk, beram leh kel a huam thu sawiin, kum 1 chhung tan zel insurance hi tih tur a nih thu leh insurance lak dawnin natna avanga ran thi leh accident avanga thite chauh a huam thu a sawi a, hetihruah hian natna avanga ran thite chu insurance tih atanga ni 21 ral hmaa thi a nih chuan insurance hi claim theih a nih loh thu a sawi a, accident avanga thi an nih erawh chuan eng hunah pawh claim theih a nih thu a sawi.

AH&Vety Asst. Director Dr Zohlimpuia chuan tun hmaa ran insurance awm tawhteah khan ran pakhata insurance tih man a san thin avangin ran vulhtuten harsatna an tawh thin thu a sawi.

Dr Zohlimpuia chuan ran insurance tih dan tur leh tihna hmun tur te, insurance claim dan turte chu mipui hnenah a tam thei ang bera puangzar turin hma an lak dawn thu a sawi a; insurance claim-naah NIC lam hian an tih turte danin hun a tiam chhunga an ti zo hman lo a nih chuan ran vulhtute hnena sum an pek tur chu zaa 12-in a pung dawn tih a sawi bawh.



KTP DAY

Vawiin hi KTP Day vawi 73-na a ni a, Mizoram chhung leh state pawna Branch tam takin a lawmna hun an hmang.

Central KTP Committee chuan KTP Day hman dan tur ruahmanna hrang hrang a siam a. Biak In chhung chhung hmun remchang laia KTP Flag tar, Biak In leh a vel tihfai, Veng chhung tihfai, mi harsa leh damlote tanpui, thisen pek leh a remchan anga KTP thil tum leh thupui zir ho tih te an ni a, heng bakah hian branch-in mahni remchan dan angin an hmang bawh. Zing kar leh chhuna hun hmang an awm tawh a, zanin lama hun hmang an awm leh bawh ang.

KTP din theihna tura hma latu, Provisional Committee-in Synod Standing Committee-ah KTP din an dil a, Synod Standing Committee chuan kum 1954 February ni 16 khan a pawm a, Synod Standing Committee-in KTP a pawm ni hi KTP din hunah pawm a ni ta a ni.

Mizorama kohhran lian ber Presbyterian kohhran hnuaia thalai pawl KTP inchhiarna hnukung bera a lan danin, tun dinhmunah branch 898 awmin, member nuiah khat sing ruk sang nga leh sawmriat pakua an awm a, an zinga nuaih khat sing khat leh 742 te chu mipa niin, a dang mi sing ruk sang thuam zathum sawmli pasarih te chu hmeichhia an ni thung.

